

CONVENIO DE COLABORACIÓN ENTRE A CONSELLERÍA DE EDUCACIÓN, CIENCIA, UNIVERSIDADES E FORMACIÓN PROFESIONAL DA XUNTA DE GALICIA E O GRUPO COMPOSTELA DE UNIVERSIDADES, PARA A ORGANIZACIÓN DO XXVIII PREMIO INTERNACIONAL “GRUPO COMPOSTELA – XUNTA DE GALICIA”, RELACIONADO CON ACTIVIDADES DE INVESTIGACIÓN, ESTUDO E DIVULGACIÓN DO PATRIMONIO CULTURAL E UNIVERSITARIO

Santiago de Compostela, 22 de abril de 2024.

COMPARECEN

D. Román Rodríguez González, conselleiro de Educación, Ciencia, Universidades e Formación Profesional, en virtude do seu nomeamento a través do Decreto 44/2024, do 14 de abril, polo que se nomean os titulares das consellerías da Xunta de Galicia, en virtude da competencia atribuída polo artigo 34.1 da Lei 1/1983, do 22 de febreiro, de normas reguladoras da Xunta e da súa Presidencia.

Dña. María Teresa Carballeira Rivera, secretaria executiva da asociación Grupo Compostela de Universidades, en virtude da competencia outorgada polo Comité Executivo da asociación o 2 de febreiro de 2017 e ratificación do posto por parte do Consello xeral da asociación na súa reunión celebrada na Universidade de Salamanca o 6 de setembro de 2018.

Ambas as dúas partes, no nome e representación que ostentan e coa capacidade legal para este acto,

MANIFESTAN

Primeiro

Que a Lei orgánica 1/1981, do 6 de abril (BOE do 28 de abril de 1981), que aproba o Estatuto de autonomía de Galicia, establece, no seu artigo 31, a competencia plena da Comunidade Autónoma de Galicia na regulación e administración do ensino en toda a súa extensión, niveis, graos, modalidades e especialidades.

Segundo

Que a Consellería de Educación, Ciencia, Universidades e Formación Profesional, no ámbito das súas competencias, está interesada en potenciar o desenvolvemento de actividades relacionadas con estudos e investigacións, así como a orientación, promoción, difusión e información do Sistema universitario de Galicia, que sexan desenvolvidas por entidades públicas ou privadas, tanto a nivel nacional como internacional, e especialmente europeo tendo en conta a relevancia e interese social das mesmas.

Terceiro

Que o Grupo Compostela de Universidades é unha asociación sen ánimo de lucro que integra a unha gran diversidade de universidades de toda Europa, nas que están incluídas as tres que conforman o Sistema universitario de Galicia. A dita asociación ten por obxectivos primordiais:

1. O fortalecemento das canles de comunicación entre as universidades adscritas á asociación
2. A organización de programas e actividades que teñen por finalidade o estudo e debate en cuestións de índole europea
3. O fomento da mobilidade e o intercambio de información, como base para o coñecemento das diversas formas culturais

Cuarto

Ambas as dúas partes teñen a vontade de establecer vías de colaboración tendentes á elaboración e realización de actividades e programas específicos de interese común.

Quinto

Todas estas circunstancias motivan unha especial atención por parte da Consellería de Educación, Ciencia, Universidades e Formación Profesional da Xunta de Galicia a colaborar co Grupo Compostela de Universidades na realización de actividades encamiñadas á internacionalización do Sistema universitario de Galicia e ao recoñecemento da excelencia universitaria, e a tal efecto,

CONVEÑEN

Primeiro. Obxecto do convenio.

É obxecto do presente convenio de colaboración establecer as condicións polas que se rexerá a colaboración entre a Consellería de Educación, Ciencia, Universidades e Formación Profesional e o Grupo Compostela de Universidades para a organización do XXVIII Premio Internacional “Grupo Compostela – Xunta de Galicia” correspondente ao ano 2024. O dito premio está dedicado especialmente a valorar ás persoas ou institucións significadas polo seu traballo, estudos, investigación e divulgacións en prol da unidade europea ou a preservación do patrimonio cultural do noso continente.

Dado que o Grupo Compostela de Universidades é o único que pode desenvolver esta acción, non son de aplicación os principios de publicidade e concorrência pública.

Segundo. Obrigas do Grupo Compostela de Universidades.

Son obrigas do Grupo Compostela de Universidades a organización do acto de entrega do Premio, o que inclúe tamén as reunións previas do xurado, así como dirixir, organizar ou participar en actos públicos como conferencias, foros, seminarios, cursos, ou similares que teñan por obxectivo a divulgación do Premio, usando para estes fins as súas instalacións, medios materiais e recursos humanos.

Terceiro. Obrigas da Consellería de Educación, Ciencia, Universidades e Formación Profesional.

Son obrigas da Consellería de Educación, Ciencia, Universidades e Formación Profesional as seguintes accións:

- Formar parte do xurado encargado de estudar as candidaturas presentadas para a súa concorrencia no XXVIII Premio Internacional "Grupo Compostela-Xunta de Galicia", representada a través do presidente da Xunta de Galicia (membro honorífico do xurado), do conselleiro de Educación, Ciencia, Universidades e Formación Profesional (presidente do xurado) e dous representantes máis que actúen como vogais.
- Financiar parte dos gastos correntes e de funcionamento necesarios para este fin. A dotación para o exercicio 2024 establécese en doce mil seiscientos dez euros (12.610,00€).

Cuarto. Financiamento.

O custo destas accións ascende a vinte e un mil euros (21.000,00€). A Consellería de Educación, Ciencia, Universidades e Formación Profesional aportará a cantidade de doce mil seiscientos dez euros (12.610,00€) con cargo á aplicación orzamentaria 10.03.422C.481.0, dos orzamentos xerais da Comunidade Autónoma de Galicia para o ano 2024.

Quinto. Pagamento e xustificación.

A Consellería de Educación, Ciencia, Universidades e Formación Profesional efectuará o libramento das cantidades establecidas na cláusula cuarta do presente convenio, despois da presentación da certificación da secretaria executiva do Grupo Compostela de Universidades, ou quen teña a delegación, que conteña unha relación dos gastos correntes e de funcionamento correspondentes a cada unha das actividades realizadas, xuntando á mencionada certificación

os xustificantes dos gastos debidamente compulsados. No caso que o custo final fora inferior a 21.000,00 €, a achega da consellería diminuíriase proporcionalmente.

Así mesmo, para a materialización do referido libramento será necesaria a emisión dunha certificación favorable da Secretaría Xeral de Universidades da Consellería de Educación, Ciencia, Universidades e Formación Profesional.

A Consellería de Educación, Ciencia, Universidades e Formación Profesional resérvase o dereito de solicitar toda a documentación que se considere precisa en relación coa xustificación dos respectivos gastos. Ademais, os asinantes facilitarán toda a información que lle sexa requirida pola Intervención Xeral da comunidade autónoma, o Tribunal de Contas e o Consello de Contas, no exercicio das súas funcións de fiscalización e control.

Sexto. Rexistro de convenios, transparencia e bo goberno.

Segundo a disposición adicional do Decreto 132/2006, do 27 de xullo, polo que se regulan os rexistros públicos creados nos artigos 44 e 45 da Lei 7/2005, do 29 de decembro, de orzamentos xerais da Comunidade Autónoma de Galicia para o ano 2006, o Grupo Compostela de Universidades consente expresamente para que a Administración inclúa e faga públicos, nos rexistros regulados neste decreto, os datos relevantes referidos ás axudas e subvencións recibidas, así como ás sancións impostas. A reserva que puideran facer os petitionarios no senso de non autorizar a obtención dos datos ou á publicidade destes nos rexistros, que en todo caso terán que se expresar, poderá dar lugar á exclusión do proceso de participación para obter a axuda ou á revogación do acto de outorgamento.

En cumprimento do disposto nos artigos 18 e 20.8 da Lei 38/2003, do 17 de novembro, xeral de subvencións comunicárase a subscrición deste convenio á Base de Datos Nacional de Subvencións que operará como sistema nacional de publicidade de subvencións e outras axudas públicas.

Así mesmo, estarase ao disposto nos artigos 4 e 15 da Lei 1/2016, do 18 de xaneiro, de transparencia e bo goberno, sobre a obriga específica de subministración de información e as obrigas específicas de información sobre convenios.

Sétimo. Natureza e réxime xurídicos.

O presente convenio de colaboración ten natureza administrativa. O seu réxime xurídico ven determinado pola súa normativa específica, de acordo cos artigos 4 e 6 apartado 2, da Lei 9/2017, do 8 de novembro, de contratos do sector público, pola que se traspoñen ao ordenamento xurídico español as directivas do Parlamento Europeo e do Consello 2014/ 23/UE e 2014/24/UE, do 26 de febreiro de 2014, que o exclúe do ámbito de aplicación da lei, sen prexuízo da aplicación dos principios desta para resolver as lagoas ou dúbidas que se susciten.

A posible discrepancia na aplicación e/ou interpretación deste convenio resolverase por diálogo directo entre as partes ou pola comisión de seguimento prevista na estipulación oitava.

A subscrición do presente convenio non supón relación laboral contractual ou de calquera outro tipo entre os profesionais que realicen as actividades obxecto do dito convenio e a Xunta de Galicia, de tal xeito que non se lle pode esixir á consellería ningunha responsabilidade, nin indirecta nin subsidiaria, polos actos ou feitos acontecidos no desenvolvemento do mesmo.

Oitavo. Comisión de seguimento.

Para o seguimento do convenio ou coñecemento de calquera cuestión sobre a súa interpretación, modificación, resolución ou efectos do mesmo que poidan xurdir, creárase unha comisión mixta de seguimento e control, integrada por dous representantes da Consellería (un dos cales actuará como presidente) e dous representantes do Grupo Compostela de Universidades.

As cuestións non resoltas no seo da comisión mixta de seguimento e control se resolverán na forma establecida pola xurisdición contencioso-administrativa.

Así mesmo, a comisión mixta desenvolverá un marco de negociación de indicadores de seguimento e impacto desta acción que serán de aplicación nos convenios que se asinen en exercicios sucesivos.

Noveno. Causas de resolución do convenio.

O presente convenio extinguirase polo cumprimento das actuacións que constitúen o seu obxecto ou por incorrer en causa de resolución.

Son causas de resolución:

- a) O transcurso do prazo de vixencia sen que se acordara a prórroga do mesmo
- b) O acordo unánime das partes
- c) O incumprimento das obrigas e compromisos asumidos polas partes
- d) Por decisión xudicial de nulidade
- e) Por calquera outra causa prevista nas leis.

Décimo. Réxime de incumprimentos

A axuda concedida ao amparo deste convenio poderá ser obxecto de modificación, revogación ou reintegro total ou parcial, xunto cos xuros de demora, cando concurran as circunstancias previstas nos artigos 32 e 33 da Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da Lei 9/2007, do 13 de xuño, e na Lei 38/2003, do 17 de novembro, xeral de subvencións.

Décimo primeiro. Cláusula de protección de datos persoais

As partes asinantes comprométense a cumprir, en todo momento, as disposicións contidas na normativa básica estatal e autonómica que xustifica a lexitimidade do tratamento dos datos persoais e dereitos dixitais.

Na aplicación deste convenio respectaranse cantas esixencias establece o Regulamento UE 679/2016 xeral de protección de datos e a Lei orgánica 3/2018, do 5 de decembro (BOE 06/12/2018) de protección de datos persoais e garantía dos dereitos dixitais, adoptando cantas medidas resulten necesarias para cumprir as súas previsións e, en particular, para garantir a

seguridade e integridade dos datos persoais e dos dereitos dixitais e, a súa protección fronte a alteracións, perdas, tratamentos ou accesos non autorizados.

Serán de aplicación todos os dereitos e obrigas derivados da normativa aplicable en materia de protección de datos e garantía dos dereitos dixitais.

Este convenio obriga ás partes que o asinan ao seu cumprimento, e ambas se someten ao acordado en todas as estipulacións.

Décimo segundo. Vixencia do convenio.

O presente convenio de colaboración manterá a súa vixencia desde o día da súa sinatura ata o día 29 de novembro de 2024, no que deberán estar realizadas as actividades obxecto do presente convenio, agás que algunha das partes o denuncie, por escrito, por incumprimento das obrigas que nel se recoñecen.

Lido por todas as partes, por si mesmas, e como proba de conformidade co expresado no presente convenio, asínano dixitalmente.

Román Rodríguez González

O conselleiro de Educación, Ciencia, Universidades e Formación Profesional

María Teresa Carballeira Rivera

A secretaria executiva do Grupo Compostela de Universidades